

四庫全書

集部

欽定四庫全書

集部

元音卷十二

詳校官中書臣丁榮祚
助教臣常循覆勘

總校官降調編修臣倉聖脉

校對官修撰臣吳錫齡

謄錄監生臣王爾熙

欽定四庫全書

元音卷十一

成廷珪

蕪城人

春夜曲

芙蓉樓前拜新月 寶鵝微熏透銀葉 吳山楚水送遠遊
不管閨中照離別 誰家玉鈎飛上天 一似連環舊時缺
缺多圓少將奈何 一寸愁腸百重結 為郎白苧裁春衣
又恐月圓郎未歸

射鴨謠

阿儂手挽竹枝弓射鴨綠楊湖水東三三五五似學武
一箭悞中雙飛鴻前船唱歌後船哭月黑湖中夜潛伏

東海健兒不敢過人命幾如几上肉老翁入縣前致辭

夜夜全家猶野宿丁寧門戶且勿開明朝又怕官軍來

送周草窗尊師歸廬山太平宮

匡廬之山仙所居銀河倒蘸青芙蓉三千里路昔一往
十八社友今何如向來匡君結廬處至今海月懸高樹

水流花落春復春洞府蒼茫隔烟霧西風蕭蕭吹短衣
賣藥修琴不歸去潯陽潮落海欲枯幾時再得麻姑書
桂風不跨林下虎回仙肯顧盤中魚幸留神物守丹鼎
喜近弟子迎飈車世間信有揚州鶴看汝乘之上寥廓
晴窗須理白雪絃夾氣仍開紫霞閣袖中寶劍且藏鋒
彭蠡小龍方睡着

江南曲

吳姬當塲春酒香翠綃短袂紅羅裳上盆十千買一斗

三杯五杯來勸郎落花不解留春住似欲隨郎度江去
酒醒一夜怨啼鵑明日蘭舟泊何處

和張孟載春愁詩韻錄寄楊鉄厓

小窗病酒厭厭卧春色三分二分過仙人漫織藕絲長
金銅難補菱花破花間黃蝶也雙飛葉底青梅纔一箇
綠筆題詩人未歸愁腸一似車輪大

湘江秋遠圖

蒼梧愁雲拂烟水日暮無風波自起何人吹簫作鳳凰

被髮臨江迎帝子黃陵女兒情更多却掩冰絲淚如洗
千年遺恨人不知坐對空山疑夢裏

上江淵丞相多爾濟國王

世祖開中國元臣起朔方八荒歸版籍千載際明良奕
世兼茅土聞孫列廟堂白麻新命相紫誥舊封王鏤玉
為符契鎔金作印章既徵扶社稷仍賚理陰陽淮海風
塵靜長安草木芳精忠存北闕化澤被南荒翠織龍衣
密黃封御酒香三吳歌盛德百辟仰輝光士競歌麟趾

人爭覩鳳凰小儒狂斐在有頌繼甘棠

送郭仲安貢察院

捧檄上京華清才世共誇封章不起草健筆自生花燕
市千金馬天河八月槎看君冠獬豸好為觸奸邪

晚出錢塘門

出城聊適意草樹碧紛紛一雨破清晨四山生白雲僧
樓緣嶺出樵逕過橋分明日重攜酒來澆和靖墳

送張可道赴嘉定府太守

秦中百二漢關河曾記乘驄舊所過棧道地形天下險
嘉州風物古來多分符又協三刀夢入境先聞五袴歌
父老扶筇親引道將軍負弩疾撫呵錦袍錯落金為帶
白馬聯翩玉作珂興學固當崇俎豆防邊還為戢干戈
四川盡省勞詢問一郡蒼生望撫摩樓倚青冥來萬境
山橫紫翠接三峨題書別館魚堪寄退食公堂雀可羅
西蜀考功當第一他山有石為君磨

寄卷為余氏賦

此身江海即蜉蝣小住菴中五百秋萬劫有窮惟道在
八方無碍與天游虎龍夜合黃金鼎鸞鶴朝飛白玉樓
暫向人間忘爾汝一瓢春酒肯相留

上清盧道士所藏雙龍圖

仙潭烟霧曉冥冥彷彿飛空劍氣腥岩穴幾年當蛻骨
畫圖今日露真形天瓢水淺陰猶伏寶藏雲深夜不扃
好就盧敖聽驅使八方行雨鼓風霆

韓致用夢鶴

疇昔相過赤壁磯
神交遺思尚依依
應從五色雲中過
還繞三珠樹上飛
月色滿庭空夜帳
露華如雨濕秋衣
蓬萊山下花無數
稚子吹簫作伴歸

東句曲外史張伯雨

霞佩翩翩出洞天
當時彷彿見臞仙
幾年東海張公子
今日西湖葛稚川
滄海塵飛丹已熟
玉堂人去榻空懸
林間載酒來相覓
乞寫山靈與世傳

送人歸桐江

讀書不謁萬乘君挾策肯傍諸侯門嘯歌蘇臺晚山碧
濯足洞庭秋水渾千金未易買駿骨一飯豈足哀王孫
風塵拂衣且歸去高卧桐江烟水村

送陳子山狀元赴太廟署令

天上詞臣錦作裳喜趨清廟奉烝嘗寶刀刻頌登彝鼎
金碗揮毫選樂章太液秋風黃鸝下齋房明月紫芝香
禮成月薦應分胙綠服承恩到北堂

送楊士安歸長安

落魄麻衣不受塵。黃金揮盡只清貧。
市上酒灌足。韋曲城南花惱人。
豪傑漫喰秦。逐客漁樵能話漢。
功臣清時老去丹心在。且把長竿釣渭濱。

九月十日自壽

余生堪嘆復堪憐。喜際明時老市廛。
把菊已從前一日種桃猶待後千年。
但令有子親書帙。莫怪無人送酒錢。
寡欲清心今得矣。煉丹何用學神仙。

徐冠未平感時傷事寄張仲舉

邊報紛紛日轉頻
彭城猶未息
風塵中原白骨多
新鬼浮世黃
金少故人阮籍一生唯縱酒
季鷹今日定思尊
河東鶴叟應相憶
落日悲笳淚滿巾

送余廷心翰林應奉

楓葉蕭蕭江已秋
吳船三日住揚州
靛花深染青綾被
雲葉新裁紫綺裘
征驛馬嘶風滿樹
別筵人散月當樓
明年春雁持書去
人在蓬瀛第幾洲

哭江州太守李子成

將帥倉皇忽棄城孤忠何以獨支撑尚聞傳檄誅狂寇
猶喜開倉舉義兵千古報君心不死九江圖像面如生
只今月黑匡廬下彷彿悲風有戰聲

題李氏藏拙齋

李君抱朴深居處曲几匡床事事幽三穴有謀憐狡兔
一巢無計笑癡鳩白雲生滿溪前面黃葉飛來屋上頭
應是此中藏大巧鳳樓十二要重修

懷方壺高士

塵湖山下足烟霞羨爾方壺道士家雨後放龍畔綠野
日中呼犬試丹砂璠林一路芝如草碧澗千年竹有花
正欲相陪此深隱半盂分我飯胡麻

送王止善歸茅山

勾曲仙人止善君亂離何處避塵氣獨乘一葦凌滄海
誰共三茅管白雲丹井澆瓢分石髓寶函封檢秘天文
他年定有方壺約幾夜蘇臺候鶴羣

楊仲德照磨自汴梁歸話中原荆棘蔽野人烟

斷絕聞復山東感而賦此

故人歸話朔方兵已下山東七十城日月未教烏兔死
乾坤方使虎龍爭入闕謾爾窺周鼎背水今誰立漢旌
北望中原五千里黃河之水幾時清

送李唐臣調山南憲幕

潮落寒汀水欲冰酌君何惜酒如渑人憐狗監知司馬
我喜龍門識李膺爽氣九秋橫楚澤先聲一日到江陵
君行自厲青雲志斤鷗終慚九萬鵬

吳中五日追念故友李時中李欽嗣有感而作
為時中生忌

夢繞南岡北嶺雲一杯無計酒松筠世間我豈長貧者
地下君為不死人夜雨自荒張祜宅秋風誰障庾公塵
於今有道俱凋喪落日江湖淚滿巾

又正月廿日聞泗州盱眙同日失守

野寨蒼茫落照中東征三載未成功黃金似土供兒戲
白骨如山泣鬼雄天狗星沈軍府動水犀兵散弩臺空

於今人力消磨盡誰念東南府庫窮

金溪葛氏二孝烈女祠

葛女祠前薦荔蕉藤花風雨急飄蕭翠輶五夜靈氛下
銀穴三年寶氣銷太史已聞書孝烈遺民無復困征徭
絳唇朱袖歸黃土惆悵何人說二喬

八月十六日送張仲舉至秦郵是夕邵文卿置

酒雲峰臺望月二首

水驛官船晚未開月明乘興且登臺揚州鶴怨山人去

甓社珠迎國士來千里何時重命駕百年今夕此銜杯
同君盡醉交游地為問秦郎安在哉

雲峰臺上今宵月竒絕平生在此行天水光搖秋萬頃
星河涼轉夜三更謫仙被酒騎鯨去游女吹簫學鳳鳴
明發星槎上河漢定傳詩話到蓬瀛

道士胡道玄嘗以一舟往來洪之東湖扁曰活
死人窩為賦此

一住行窩幾百年蓬頭長日走如顛海棠亭下重陽子

蓮葉舟中太乙仙無物可離虛殼外有人能悟未生前
出門一笑無拘碍雲在東湖月在天

宿鶴沙張氏草堂

草堂借我作行窩杖履頻煩太史過滿地白雲清晝永
隔溪黃鳥綠陰多銀瓶自瀉中山酒鐵笛誰翻小海歌
今日逢君須盡醉西家亭館奈愁何

寄周平叔先生就求蒼耳子

周侯久不通書問夜夜滄江入夢頻五月採來蒼耳子

幾時分送白頭人
沙頭酒熟田毛足
港口船來海錯新
南北相望千百里
老來幽獨倍傷神

赤壁圖

赤壁磯頭禿鬚翁
興來携酒汎秋風
偶論水月盈虛際
併入江山感慨中
華髮多情傷老大
皇天無地着英雄
神游八極知何許
良夜應騎一鶴東

奉寄李子潔憲副時湖北殘破却遷太平開司
武昌遺老望旌旗
正是諸君報國時
令第九江全死節

明公南海有生祠臺中妙選丘山重湖北先聲草木知
一道憲綱還舊覩真儒端可共安危

次李希顏述懷韻

八月邊聲草木寒愁來短髮不勝冠諸公莫誚王夷甫
我輩終慚管幼安酒券如山空好客田毛何日再輸官
蘭陵溝上松無恙還有孤猿夜夜看

遊平江瑞光寺

水殿雲廊取次開不論廬阜與天台窗間燕雀馴相近

池上龜魚喚亦來春雨久荒紅藥圃香烟遍繞碧蓮臺
上方似可容吾隱也伴高僧坐石苔

寄題上海積善菴水竹軒

水閣雲廊深復深開軒綠霧常陰涼宵濯足月在港
清晝讀書風滿林食筍也勝魚肉味截筒誰作鳳凰吟
清涼更在聲塵外夜夜海潮生妙音

送學無遇長老歸江南

新賜袈裟染茜紅拈花消息悟靈峰大開海會容三教

遠致嵩呼祝九重貝葉有書駛白馬葛藤無語問黃龍

湖船滿載燕山月歸照招提萬樹松

送智隱住水月禪寺

放船直到栖禪處萬頃湖心一鏡開綠樹鳥驚風落果
碧潭龍去水生苔西岩尊宿傳燈在東海高僧杖錫來
今夜月明清似水大空無地着纖埃

題徽宗畫梔子白頭翁

梔子紅時人正愁故宮衰草不勝秋西風吹落青城月

啼得山禽也白頭

春夜

酒兵無力破愁城春盡空山杜宇聲敲缺墜壺眠不得半簾花影月三更

題明皇吹簫圖

華萼樓前柳色新東風吹散馬嵬塵錦囊玉管俱零落誰是終南夢裏人

徐秋雲

觀國詩

金溝晴色照燕然
紫殿紅樓玉樹烟
萬雉入雲環五衛
六龍扶日擁羣仙
教坊月夜歌如水
繡局春風錦作天
挾策遠臣身萬里
只將金鏡獻君前

登桐柏宮

十八回亭雲氣濃
雲邊清磬落寒松
山巔忽涌地百頃
世上已登天一重
丹井龍蟠金薜荔
簫臺人化玉芙蓉
沈沈雙闕神仙府
應隔寒陽第幾峰

武帝

萬戶千門禁漏遲
建章花發錦成幃
瑤池有信青鸞至
金屋無人白燕飛
風起輪臺春寂寂
露零仙掌月輝輝
樓船簫鼓鱣華夢
汾上年年只雁歸

明皇

太平風月屬三郎
羯鼓聲高思轉長
天子錦纏娛虢國
貴妃音律教寧王
人歸巫峽山空在
花落溫泉水更香
誰信蓬萊青鳥使
回來無語怨漁陽

閨怨

一自錦郎出劙溪簫聲長伴乳鴉啼魂銷秋水玉蟬翼淚鑄春風金裏蹄別恨不禁楊柳外相思只在杏花西珠簾夜夜空明月愁殺落紅香滿泥

武林

芙蓉城闕夕陽紅歌舞三千上碧空繡嶺看花蝴蝶夢錦江吹酒鯉魚風當年紫簾開仙仗今日青山是梵宮曾向黃金臺上望九天閻闔五雲中

美人圖

玉佩鳴璫照素秋
綠雲扶夢下
瓊樓瀟湘一片芙蓉雨
珠箔沈沈不上鉤

寄友

憶別錢塘第幾春
舜江春水綠如雲
小樓吟倚孤山月
只有梅花可寄君

張憲字思廉
會稽人

縛虎行

白門樓下兵合圍白門樓上虎伏威戰尖不掉丈二尾
袍花已脫斑爛衣掉虎腦截虎爪眼中看虎如貓小猛
跳不越當塗高血吻空腥千里草養虎肉不飽虎飢能
噬人縛虎繩不急繩寬苦無親座中臣信劉將軍不縱
猛虎食漢賊反殺猛虎生賊臣食原丁食卓董何足瞋
梁甫吟

伏龍隱南陽高卧久不起不隨老虎渡長江肯逐凡獮
過漳水炎炎火絕刃金刀巍巍土旺當塗高種瓜兒子

不力戰織屢郎君無地逃伏龍一起撼坤軸雄據西南
成鼎足十年汗血戰玄黃五度王師爭九六美髯熊環
眼如虎大刀長矛佐行伍河南河北謾稱雄不得袁曹
一塊土伏龍後出帝業新千古君臣魚水親遂使真龍
全羽翼風雲成就二將軍

南飛鳥

南飛烏尾畢逋白頭啞啞將四雌渭河西岸逐野馬白
門東樓追赤菟冀豚荆犬肉不飽展翼南飛又江表江

東林木多後禽不許南枝三匝繞老鳥莫侮鬚郎小鬚郎
詎讓老鳥老東風一炬鳥尾焦不使老鳥矜觜爪老鳥
自謂足奸狡豈信江湖多鷺鳥能猝老鳥頭能啄老鳥
腦不許老鳥爭樹枝肯使蛟龍競池沼釋老鳥鳥未搏
紫鬚大耳空相攫河東老羽雲外落老鳥巢成哺銅雀

大腹兒

塵巫夜禱軋犖山搖光下燭穹廬寒柳城男兒不敢睡
四野惡聲啼狗犴猪龍怒磔老梟腹鱗甲麤踈頭角禿

婪酣犬肚三百斤偷得真龍幾分福范陽擅帳妖潛形
平盧寶刀遲發硎金雞口吐東北赦青螺啼作西南聲
鳳凰春池金鏡破獮豸霜臺胡眼大東風野鹿嚼楊花
白日妖狐登御座華清玉甃湯作泉洗兒果撒黃金錢
并刀剪綵十大幅錦綳壓碎宮娥肩象牀夜冷嬰兒哭
猪龍爪破金訶玉香齦不痛荔支漿雄心已飽雞頭肉
長安天奪蜜口臣銅頭鬼鼓漁陽塵赤心一夜變胡腹
二十四郡俱無人潼闕夜漏雞聲早馬嵬坡下冰山倒

劍門西寄杜鵑巢練帶玉環埋翠草嘉山玉門勤戰功
猪兒帳下屠猪龍旄頭星落大腹破机上鸞刀一尺紅

鎔鶴心

獺皮禱

湖陰阿賴藕絲裙川后封作魚梁君紫蘭碧露飽膏沐
瑤堯光映玻璃雲冰肌夜怯凌波冷蛻骨來依合歡枕
裁花剪霧八尺強龍測塵消圓春錦皮毛剥盡貴心知
張膽猶能分酒卮香魂悵落金鑰血恨殺東平輕薄兒

玉溪詩勝無病腦十二葉肝任渠好衣襟不住夢中花
鼈背香烟濕瑤草

陳古春

獺皮褥

賴侯失國毛嬌老蓮葉裳衣為誰好曲阿湖上采菱舟
濺血淪精哭秋媼祭魚永謝菰蒲春去作香魂薦寢裯
綠雲四面裁如意毳影當中吹暖塵玉指象林聊歲晚
絕勝會死龜茲板聞道驚鱗膽尚寒莫教展放芙蓉館

流酥帳裏佳人語卷却龍鬚偏愛汝夢中若更說離騷

腸斷靡蕪楚天雨

謝宗可

睡燕

補巢銜得落花泥困倚東風倦翅低金屋晝閑隨蝶化
玉堂春靜怕鶯啼魂飛漢殿人應遠夢入烏衣路欲迷
却被卷簾人喚醒小橋流水夕陽西

同根竹

競秀冰霜一種奇
駢頭曾脫錦棚兒
西山二子情依舊
湘浦雙娥影鎮隨
高節元非連理樹
虛心共是傲霜枝
莫教移作仙人杖
恐化雌雄下葛陂

趙君謨

碧筒飲

擎波老榦折蒼璫
酣飲何如吸海鯨
象鼻捲冰收玉醴
翠盤承露落金莖
幾絲香溜葡萄滑
九竅春濃琥珀傾
莫戀醉鄉心更苦
獨醒衣上為誰清

吳炳

字彥輝

詠塵

氣氤隨騎集散漫依風度似霧暗津樓連雲隱郊樹漸
迷烏几色已失京衣素嗟予南北人長年事行路

古鏡

雁去悲銀海螭蟠泣鬼工黃腸迷漢柏野火上秦蓬濃
翠凝螺黛鮮朱漬守宮漆添燈暈黑文滅繡奩紅一旦
珠還浦千年劍出鄆霧餘空黯淡雲在月朦朧伏獸銜

絲結蒙綿畫羽蟲粉綿施婉轉臺玉剥玲瓏匪如曾申
誠惟明可保躬他時賜盤鑑來照夢中熊

吳嵩

字維申廬
陵人

古釵歎

何年美人寶釵失深井沈泥汚玓瓈一朝拾得再揩磨
三回五回看歎息雙鸞匹鳳兩股勻終然汚色難為新
當時光瑩照頭上有似桃李搖青春今人不識古儀狀
寶釵雖好非時樣為君插罷擁髻悲物無貴賤皆隨時

張崇字彥高
東平人

古行路難

君不見古來行路難只有荆卿報燕丹
感君恩厚為君死自知故國一去無生還
秋風易水無今古中有恩情別時語武陽
飲酒荆卿歌壯士相看面如土
秦山嶧嶧秦闕高奮身西上
騰驚猿盡傾肝膽許知已性命不啻輕
鴻毛奉圖再拜王心喜圖窮匕首明
秋水劫王復地計全非何處秦雲哭燕鬼
當時一語思匡國精神動天

虹貫日狂謀肇禍鬼不祀大業帝羸天與力虎鬚堪編
尾堪履倒捲天河恨難洗臣身塗炭君莫論萬死報君
期世世行路難君當聞丈夫莫忘沾人恩殺身徇名信
絕倫可憐孤負樊將軍

錢惟善

送賈元英之照潭

照潭遙望九華山弓馬蕭蕭日暮還夢裏無題惟寄內
胸中有策欲平蠻落花閉戶眠黃犬明月開籠放白鶲

絳灌何曾輕賈誼早隨鷁鷺入朝班

清逸齋

神仙官府曾為吏一日乘風即掉頭太白豈惟凌鮑謝
元卿只合友羊裘門前種樹雲連屋湖上聽潮月滿樓
遙憶五經名隱地峩眉高聳蜀天秋

送達兼善之京

龍飛天子中興年使者弓旌集俊賢閨闥早朝班玉筍
瀛洲夜直賜金蓮五經同異須劉向三絕才名數鄭虔

黼黻當年遺老在長歌黃鸝送樓船

卞宜之

鐵笛詩寄楊廉夫

一段清冰百鍊鋼曾翻宮徵侍虛皇裂開黃鶴磯頭石
驚落青鸞鏡裏霜仙子佩環新樂府翰林風月舊文章
道人清節磨礱久却笑桓伊獨據床

潘純字子素

錢塘懷古

海門寒日澹無暉偃月堂深晝漏稀萬鈞貔貅江上老
兩宮環佩夢中歸內園羯鼓催花發小殿珠簾看雪飛
不道帳前胡旋舞有人行酒着青衣

題鄂王墓

湖水年年自綠波空林人跡少經過夜寒石馬嘶風雨
日落山精泣薜蘿江左長城真自壞鄴中明月為誰歌
空餘滿地萇弘血芳草年深碧更多

題宋高宗劉妃圖

秋風落盡故宮槐江上芙蓉並蒂開留得君王不歸去

鳳凰山下起樓臺

題趙子固畫蘭

江上青山日欲晡幽花小紙墨模糊華清宮殿生秋草

零落滕王蛱蝶圖

程文

字以文

送文仲德之臨洮帥府經歷

吾聞洮州綠石堪為硯能淬筆鋒如淬劍地靈天寶愁

鬼工埋沒塵沙羞自獻羌童目悍手足鮮掛弓走馬唯
臨邊雄藩令嚴烽燧息鼓角晝靜旌旗懸幕官姓文不
好武要使西羌化東魯詩書埋按夜生輝親寫封章上
天府豪豬之靴青兕裘時平不願萬戶侯但得洮州綠
石硯歸來泚筆立螭頭

倪瓈

字元鎮
毗陵人

春日雲林齋居

臨池春流駛掃地夕陰滿正襟味道言迢遙出溪館嵐

領當書榻煩襟一舒散靡靡松花黃逐逐雲氣暖石梁
青苔合於焉人跡斷故非與世違冥棲遂忘返

聽袁子方彈琴

蕙帳凝夕清高堂流月明芳琴發綺席列坐散煩纓迴
翔別鶴意縹渺孤鸞鳴一寫冰霜操掩抑寄餘情

王冕

會稽人

書懷

世情多曲折客況自堪憐聽雨愁如海懷人夜似年草

肥燕地馬花老蜀山鵠冷淡無歸計蒼苔滿石田

梅

我家洗硯池頭樹箇箇花開淡墨痕不要人誇好顏色
只留清氣滿乾坤

李鵬

字萬里江西人

三尺水劍歌

龍侯手提三尺水清晨訪我古獄裏直愁雲氣感星辰
滿目寒光素濤起玄冰凝結搖空青芙蓉白日生精熒

爲君拂拭開寶匣
炯若積雪涵疎星
起看天地雲冥冥
誰其麾叱走六丁
爲擊風雨驅雷霆
蕩滌氣祲萬國寧
上頭銘字侯所作
辭嚴義正發炳靈
憐君少年負才氣
每能仗義討不庭
側身北望空馳情
君不見燕丹夙昔
得荆軻尊前擊筑揚
悲歌咸陽西入萬狼虎
白虹貫日橫秋河
英雄事去一朝異
奈此古來憂憤多
憂憤多向誰語我
有高懷亘千古
黃金不用買功名
失勢因之虎爲鼠
嗚呼腰間寶玦棄
如土爲爾更歌公莫舞

鬼首法刀歌

犴狴雲黑風怒號古柏下陰青天高白頭獄卒氣如虎
示我鬼首之法刀刀光閃閃展秋練朱髮蒼鬚颯青面
亥冥使者為護持一夕蟠空起雷電雷公霹靂電火微
恨血漠漠青燐飛妖狐跳梁天狗吠北斗白日無晶輝
君不見東南羣盜方馳突黃牛峽西更倉卒酒酣激烈
風火生我欲持刀待明發青燈熒熒古獄中起來搔首
亂飛蓬還君此刀淚沾臆嗚呼壯士今沈鬱

萬德躬

退宮人引

駝絨繡帽紅顏頰素髮微連細紗結出宮嫁作海商妻
裙腰尚帶河西褶少年十五二十時中宮教得行步齊
春羅夜剪繡花帖階前夜舞高夔麗寵姬當前翠衿小
便覺中原美人少金蓮斜抱捧珠龍玉籠倒掛收香鳥
年年宮中春日長小車銀甕蒲萄香香殿吹簫鳳凰語
一日再宴諸侯王舞因樓蘭過三十內家別選娥眉入

雖名遣送半無家旋賣珠環問親戚一為商婦始自憐
十年不見回番船年多不記教坊曲時時尋撥相思絃

題陳希夷像

花項君王瓦棺冷柴家陵上西風緊殿前點檢不知名
醉眼摩挲晚周鼎白晝龍虎行天階紫微小星何僭哉
先生大笑出門去明日華山歸去來山色還如舊時好
流水小橋散芳草千載誰知驢背心芒碭雲深入孤鳥
汴城峨峨汴水流江南江北數百州秦王未已晉王起

人間萬歲更千秋

棄婦吟

上堂拜姑姑不語門外上車別鄰里命輕不敢怨他人
回頭却顧房中女女子勿啼汝父賢必不嫁汝狂少邊
丈夫有心只如一蕩子情多無十年風吹柳花春日暮
鄰姬送上来時路父母俱亡門戶衰未到先愁兄嫂怒
歸家明鏡半無光繡帶雙紅空斷腸今夜無人看夫婿
雨打梨花孤夢長

陳濟淵

海東青

怒挾孤風海外來脩翎如劍斫雲開潛身陡縮千尋起
得意雄攀一點回萬里老拳無脫腦滿韁英氣不凡材
山巍野雉回首神物無心到草萊

楊西亭

江浙貢士

題馬元德知州華山春曉圖

三峯列金精層崕麗璇霄地高萬靈會日出諸山朝松

陰停鶴馭花間聞鳳簫獨尋希夷叟相與談逍遙

陳高

字子上永嘉人進士秘書監丞

商婦怨

嫁夫嫁商賈重利不重恩三年南海去寄信無回言妻
身為婦人不敢出閨門縫衣待君返請君看淚痕

銘敬

字伯惠清江人

賦得瀟湘曲送復上人之湖南

瀟湘露白西風起江竹斑斑澧蘭紫神僧八月遡星河

一杯飛渡瀟湘水瀟湘兩岸遙相望仙人霞裾白霓裳
炯炯吳絲照清浦鳳棧製錦迴龍章翠筦銀牋為誰寫
璫佩蠻珠爛盈把蘭橈歸來江渚空五兩懸風疾於馬
鶯鵠啼雨蒼梧秋渺渺吳雲天盡頭翠珉剥得蛟龍字
寄逐南鴻湘水流

楊祖恕

字仲如號近齋鄞人

歌風臺

怒濤突千騎上有崢嶸臺六合一望間萬里天風來疇

昔龍虎氣芒碭深雲堆煌煌赤幟立赫赫炎運開皇靈
固有屬亞父徒驚嗟得志家海內故鄉重徘徊寤寐猛
士守宿將胡嫌猜矧茲霸心存咄被後乘駘朗咏三侯
章擊節嗟雄哉

周永言

字懷孝富州人

春日感興

春風庭院柳吹花暗度流年感物華石斛水香魚有子
畫梁灰冷燕無家春愁爛漫來難遣午夢飄蕭去莫遮

欲泛曲江陪舊宴浪船搖曳晚川斜

次毛楚實韻

聲譽無間五十前一身為客動經年紗帷授業花生眼
銀燭抄書雪滿顛晴樹畫圖開曉日暮林樓閣倚春天
畏人風雨時時有神劍那應久蟄淵

元音卷十一

欽定四庫全書

元音卷十二

楊維楨

字廉夫號鐵崖

鴻門宴

天迷闕地迷戶東龍白日西龍雨撞鐘飲酒愁海翻碧
火吹巢雙猰㺄照天萬古無一鳥長庚破月來天隅坐
中有容天子氣左股七十二子聯明珠軍中十萬震屋
毛拔劍當人面如赭將軍下馬力拔山氣捲黃河酒如

瀉劍光上天寒彗殘明朝畫地分河山將軍呼龍客將走石破青天撞玉斗

虞美人歌

拔山將軍氣如虎神雕如龍踏天下將軍戰敗歌楚歌
美人一死能自許愴惶伏劍答危主不同野雉隨仇虜
江邊碧血吹青雨化作春芳悲漢土

題青蓮居士像

天人騎龍飛上天一念下謫三千年長庚文章光照地

在古無上今無前天台道人一傾倒有如大鵬遇希有
烏紗白苧登闕庭天子見之如綺皓萬言倚馬真天材
酒酣誤觸玻璃杯忠誠白日不照鑑洗天風雨何時來
七寶宮床不為泰夜郎之天豈為隘八極揮斥列缺鞭
泰山培塿風雷噫人言捉月采石江豈知騎兎長庚傍
自非廣寒玉虛貯神彩桂殿何處人間涼周郎尺素間
清揚皎如白月射屋梁千金好事摹七字安得筆光干

丈强

題楊妃春睡圖

沈香亭前燕來後三郎鼓中放花柳西宮困人春最先
華清溶溶煖如酒雪肢欲透紅薔薇錦襠卸盡流蘇幃
小蓮侍擁扶不起翠被卷作梨雲飛蟠龍髻重未勝綰
燕釵半落犀梳偃晚漏壺中水聲遠簾外日斜花影轉
琵琶未受宣喚促睡重黎腰春正熟不知小棚思塞酥
夢中化作銜花鹿

賦海涉

海風吹沙潮欲來青蝦亂跳凝紫苔初疑長劍研出老
鮫血又疑霹靂擊破妖龍胎蟹湯微泣瑪瑙髓蜀錦亂
把并刀裁紅冰嚼碎齒不冷丹霞入腹鳴飢雷坐令海
水化作蒲萄醅我當大嚼一飲三百杯

送日本僧

山為城海為池龍伯有國東海陸我皇仁風被八極其
王錫貢多珍奇樗社子雪獅獮跨海來拜天人師神鼇
鼓濤雪山白浪花作雨青天低龍驤何啻萬斛重大風

開帆秋葉飛手提隻履葱蘋西七條挂在扶桑枝城頭
鼓響城下馬嘶人從大唐國裏歸

海隄歌為餘姚州判官葉敬常賦

天吳蜚精衛啼娥江之北蛟門之西大禹東來朝會稽
九河一疏錫玄圭寥寥三千載桑田變滄海洚水日橫
流我恩訴真宰相門子葉大夫蒞政三月初海如瓠子
決灘瀨趨紅濤黑浪爭吞屠元光白馬有祭璧羽山黃
熊無玉書蛟眼赤射日蜃民不寧居葉大夫海砥柱驅

鬼鞭運神斧五丁一力萬夫一語新甫取柏崑山取石
金錐築土首鎖陽侯之咽脚踏支祈之股玉繩永奠三
萬六千尺陳公隄白公渠無足數君不見石人夜語魯
已仙河伯血面上訴天葉大夫回狂瀾障百川海不波
石不穿河清海晏三十年

寄韓李二御史同年

揚子十年官不調豈無詞賦列時髦青冥遠隔新持斧
雨露猶同舊賜袍共喜諸公當北道可容獨客卧東臯

斗牛清夜能回首一道豐城劍氣高

送高舜臣會試

公子才名玉牒賢鄉書屢薦許誰先可無大對三千字
獨抱遺經二十年曉日天門金字榜春風官馬錦花鶼
鳳凰臺上泥金帖早報璫林第一仙

寄丁仲容

帝王州裏丁令尹一時才氣絕無前空勞太史觀星象
未向金陵捉酒仙獨唱斗南詩似錦醉歸月下馬如船

封書已寄茅山鶴共上揚州十萬經

送僧歸日本

東風昨夜來鄉國又見階前吳草青金錫躅空靈鳥逝
寶珠喚海毒龍腥車輪日出扶桑樹笠蓋天傾北極星
我欲東夷訪文獻歸來中土校全經

贈瓊花珠月

新年春色在鄰家隊子三三聚館娃月滿十分珠有價
花開第一玉無瑕葡萄酒濛沉櫻果翡翠裙翻踏月牙

老子圍紅先點筆詩成免飲白蓮花

翡翠巢

羅浮花使先春到來傍玉樓深處巢舞雪豔翻楊柳絮
歌雲輕壓海棠梢屏開時露鴉頭襪絃斷應銜鳳觜膠
却笑雪衣娘太劣雕籠深鎖未全教

醉和篇字韻

夜來病酒朝來眠樂府新聲已浪傳燕語鶯啼春箇箇
花枝草蔓錦篇篇虎頭品藻成三絕老監風流擅八仙

莫唱回風到秋葉瓊花舞袖正嬋娟

嬉春體五首

錢塘湖上作

今朝立春好天氣況是太平朝野時走向南鄰覓酒伴
還從西墅買花枝陶令久辭彭澤縣山公只愛習家池
宜春帖子題贈爾日日春遊日日宜

西子湖頭春色濃望湖樓下水連空柳條千樹僧眼碧
桃花一枝人面紅天氣渾如曲江節野客恰似杜陵翁
得錢沽酒勿復較如此好懷誰與同

何處被春惱不徹好春最好是湖邊不須東家借騎馬
自可西津買蹋船燕子繞林紅雨亂鳬雛衝岸浪花圓
段家橋頭猩色酒重典春衣沽十千

入山十里清涼國三百樓臺迤邐開岳王墳前弔東度
隱君寺裏話西來接果黃猿呼一箇探花白鹿走千回
風流文采湖山主髮白應須屬有才

長城小姬如可憐紅絲新上琵琶絃可人座上三珠樹
美酒沙頭雙玉船小洞桃花落香雪大堤楊柳掃晴烟

明朝紗帽青藜杖更訪東林十八仙

溪舫齋

道人自愛溪屋好溪屋小如書畫船錦袍每愛月下坐
醉眼忽疑蓬底眠蘆葉秋風一雁過桃花春水雙鷗前
何時挈家海上去拾得驪珠如月圓

送秦刺史赴召史館

會稽太守文章伯玉牒仙人第一籌柱下去為周太史
枋頭今見晉春秋衰朝閏厄三分國治鑑明開十二旒

柱筆須裁五色詔香烟長傍亥龍浮

寄康趙二同年

榜中龍虎稱康趙每見除書作要官一代文章驚海內
百寮風采聳朝端課章長聽尚書履柱史方加侍御冠
揚子十年名不調看花猶似夢長安

過沙湖寄玉山伯仲

五月落殘梅子雨沙湖水高三尺强大風開帆作弓滿
白浪觸船如馬狂唱歌賣魚赤髯老打鼓踏車青苧娘

故人相見在樓下坐對玉山懷草堂

無題四首

當軒隊子立紅靴龜甲屏風擁絳紗公子銀屏分汗酒
佳人金勝剪春花曲調青鳳歌聲轉觥進黃鸝舞勢斜
五十男兒頭未白臨流洗馬走江沙

主家院落近連昌燕子歸來舊杏梁金埒近收青海駿
錦籠初放雪衣娘卷衣甲帳春容早吹笛西樓月色涼
今夜阿鴻新進劇黃金小帶荔支裝

二月皇都花滿城
美人多病苦多情
一雙孔雀銜青觜
十二飛鴻上錦箏
酒掬真珠傳玉掌
羨分甘露倒銀罌
不堪容易少年老
爭遣狂夫作後生

天街如水夜初涼
照室銅盤璧月光
別院三千紅芍藥
洞房七十紫鸞鷺
繡靴蹋踴句驪樣
羅帕垂鸞女直妝
願爾康強好眠食
百年歡樂未渠央

揭法字伯防
號章人秘書監丞

汪大雅善隸書詩以贈之

漢隸變秦石中郎實云祖渾渾元氣運生意蓄未吐鍾
梁已小變唐遂失其武迨元數公起精妙可追古鳳翥
與鷺翔爛然照中土老成既凋謝來者或未覩紛紛欲
爭高往往背前矩峭刻少渾成癡肥乏筋膂收斂類畏
縮軒張或傷怒規規事模放又若優孟舞汪君忽傑立
落筆蔡為主見此神骨全真若古鍾呂美玉出荆璞明
珠還合浦況當文物新制作方並舉紀常勒鐘鼎封岱
禪梁甫大書與特書執筆當俟子具茲華國文名已登

天府

秋夜懷芑禪師

商飈起西郊
槭槭振林木
玄鳥辭故壘
蟋蟀入墻屋
雲間出華月
照我尊中綠
引觴不能盡
彈琴不成曲
敢恨時物遷
只歎流景速
獨羨清泉師
悠然在空谷
雞鳴天未曙
披衣候清旭

陳廷言

字君從
天台人
江浙貢士

錢塘懷古

越水吳山共寂寥已無遺老話前朝海門三日潮聲歇
天目千年王氣消夜月烏啼龍井樹春風花落海鮮橋
威儀文物今何在回首浮屠倚碧霄

桂璫字懷英號古香
老撫慈溪人

長江萬里圖

萬里澄江一葉舟披圖忽憶少年遊落霞孤鶩洪都晚
明月清風赤壁秋有客吹簫尋故壘何人擊楫誓中流
浪淘不盡英雄恨都把興亡付白鷗

孫庚字居仁號雪
穀慈溪人

卷十二

題荷花卷送季山甫

涉江采芙蓉江長浩烟霧搖蕩木蘭舟依稀認前路粉
花委秋風翠實待寒露徘徊水中抵佳期未云暮歸來
明月多擢歌起鴛鷺

題定海七塔寺

塔影參差倚殿庭好山晴湧屋頭青土龍剗目潭波息
藥草成金藏佛靈白鳥破烟江樹曉黑鼉吹雨海雲腥

禪房似隔人間世一榻松風晝掩扃

陸景龍字德陽號李人江浙貢士

送吏部焦郎中

黃道天開紫極高爐烟繚繞拂宮袍漢家人物追三代
周典天官冠六曹翠幙畫闌吟芍藥玉壺春煖醉蒲萄
袖中應有山公啟月旦無辭獻納勞

楣杖窩

安樂窩中興澹然靈根斫得自樵仙地爐伏火春如海

雪屋圍風夜似年香透玉酥和芋撥脂流琥珀帶松燃
絕勝沉水燒金鴨吹徹參差惱醉眠

蠶窩

斗室團團素箔圍梅花夢裏似還非一規明月抱銀甕
無數晴雲為白衣壺隱仙翁形若蛻巢居羽客步如飛
孰知志在經綸內五色文章出錦機

梅影

一自逋詩為寫神橫斜意態宛如真壽陽鏡裏春風面

仙子江邊水月身晴雪隔窓花似霧凍雲印地玉無塵
夜深低轉雕闌去空憶羅浮夢裏人

題趙松雪人馬圖

閣老風流世絕誇揮毫寫此兩名騶玉闌秋遠風生樹
銀海春明浪蹴花一代衣冠淪草莽百年縞素颯風沙
蕭蕭白髮鄞江上見畫令人重歎嗟

題慈溪孫氏瑞萱堂

慈溪之許孫郎家弟兄孝感良可誇立冬正當建子月

北堂忽放宜男花熒然孤婺撫二豎宛如一榦含雙葩
信知嘉祥天所錫我歌此詩賡白華

杜甫遊春

杜陵野客興蕭騷策蹇行春樂更饒楊柳煖風欹醉帽
杏花微雨濕吟袍推敲謾說衝京兆清絕徒憐過灞橋
直許文章光萬丈謫仙聲價兩相高

濂溪愛蓮

窓前旣云不除草溪上胡爲獨愛蓮君子風高還宛似

先生雅趣自悠然神交淨色遠香外秋在光風霽月邊
萬物生生皆太極始知一畫自先天

淵明對菊

彭澤歸來秋已老黃花無數繞東籬采芳謾爾不盈把
感物悠然有所思五斗折腰慚可去一尊遣興醉何辭
衣冠不改仍如晉搖落風霜在義熙

和靖觀梅

銀嶼蜿蜒一徑斜先生卜築隱烟霞高風自是天下士

雅好何如雪裏花水影月香傳妙句山童野鶴伴生涯
茂陵封禪無遺稿贏得清名百世誇

紙帳

溪藤搗雪淨無瑕素箔圍風絕可夸夢入青虛明月偃
神遊廣漠白雲遮繭窩春煖浮銀色皎室宵分散玉華
野鶴一聲天已曙老夫詩思繞梅花

挽普大夫

英英正氣鍾河嶽赫赫高名照古今七道提綱徒赤手

九泉飲恨只丹心臺空鳳去秋雲慘屋冷烏啼夜月沈
珍重遺章猶絕筆令人一讀淚沾襟

題鎮南王納涼圖

憶昔揚州全盛日內家輪奐見翬飛芙蓉仙館紅香凝
楊柳歌臺紫翠圍雲母屏開秋澹澹水晶簾捲月暉暉
十年一覺鵩華夢春草王孫怨不歸

春日遣懷和吳主韻二首

閑愁日日不能禁謾賦停雲感寸心老去一貧何至此

春來多病到如今
門前花飛萬點急
湖上水添三尺深
却喜小樓當綠樹
可人時復聽鶯音

近聞海內戰塵消
畢事堯萬里江山隨地闊
四郊花木放春饒
求賢漢使頒明詔
興學文翁有教條
衰老自慚無寸用
願歌擊壤答清朝

送趙士元兄弟還永嘉省親

汝伯大參天下士
而翁太守斗南人
二難表表聯金玉
三俊英英總鳳麟
滄海月明懸珮潔
赤城霞彩絢衣新

時人應比河東薛早立勲名據要津

題墨菊

東籬正色本來真子墨何如強寫神滿向繙塵非舊日
西風羞見白衣人

題紅梅

昔醉西湖處士家酒痕吹上水邊花東風蛱蝶迷香夢
一樹珊瑚月影斜

題定川陳仲章梅坡稿

陳君梅屋近蛟門
鮫客綃成每見分
從此胸中有機軸
解將五色織春雲

納新
字易之
南陽人

賣鹽婦

賣鹽婦百結青裙走風雨
雨花灑鹽鹽作鹵
背負空筐淚如縷
三日破鐺無粟煮老姑
餓寒更愁苦
道傍行人因問之
拭淚吞聲爲君語
妾身家本住山東
夫家名在兵籍中
荷戈崎嶇戍明越
妾亦萬里來相從
年來海上

風塵起樓船百戰秋濤裏良人賈勇身先死白骨誰知
沈海水前年大兒征饒州饒州未復軍尚留去年小兒
攻高郵可憐血作淮河流中原封裝音信絕官倉不開
口糧缺空營木落烟火稀夜雨殘燈泣嗚咽東鄰西舍
夫不歸今年嫁作商人妻繡羅裁衣春日低落花飛絮
愁深閨妾心如水甘貧賤辛苦賣鹽終不怨得錢糴米
供老姑泉下無慚見夫面君不見繡衣使者淛河東采
詩正欲觀民風莫棄吾儂賣鹽婦歸朝先奏明光宮

仙居縣杜氏二真仙廟詩

東陽杜氏二女子早喪父母鬻餅市中厨人挑之二
子憤殺厨人走匿仙居之孟溪夜雨水漲皆溺死其
屍閣鉅木上蒼藤纏束儼若棺椁時隋大業間也唐
令令狐某取其遺骨塑像建廟溪上宋時古靈陳襄
禱雨屢應刻石祠下國朝至正壬寅東陽陳君元祥
以漸省員外督制茲邑水旱之禱顯有奇應明年君
督漕入京請諸中書令太常議封貞惠貞淑二真仙

元祥因徵賦詩廟壁云

君不見瀟湘江上班斑竹雨灑踈林淚痕綠又不見金
谿縣裏兩嬪娟身化白金金賤復至今九疑山下大江
西宵窕祠堂依古木仙居更有杜貞娥千古清風凜相
續貞娥鬻餅東陽市厨人相挑憤切齒提刀夜斷賊奴
頭勇烈真同丈夫子脫身竄匿來益溪木食澗飲幽岩
棲羝羝姊妹自相保天寒愁聽哀猿啼夜雨奔流溢山
趾月黑溪深黯無底嗚呼雙娥同溺死玉骨藤纏高樹

裏開元賢令銜餘哀築祠却傍蒼崕開悲風瀟瀟落山葉精靈日暮猶歸來陳侯自是古靈後來作仙居民父母銜香赤脚禱龍湫秋日甘霖起枯朽去年飛章徹九門紫綾裁詔褒貞魂鸞車孔蓋蔽白日冕鶩來謝朝家恩男兒堂堂軀七尺忍詬含羞汙簡冊何如貞惠貞淑兩真仙萬古千秋長廟食

錢塘留別啞爾丞相之會稽代祀

聖主臨軒授寶匱詞臣將命祀東南胥江潮上迎官舫

禹穴雲開擁使驂
萬里兼程安敢後
四方專對每多慚
千官法仗遙相送
始覺皇恩似海涵

使歸

白頭萬里喜來歸
小院深深過客稀
睡起無題閒錦橐
春來多病怯羅衣
流鶯亂蹴殘紅溜
乳燕爭銜落絮飛
莫道山房渾寂寞
卧聽小女學鳴機

陳植字沖吉
江西進士吉州永豐

題禰氏杏林卷後

禡子洲前萬杏花一壺仙隱自成家抄書簷下分清露
洗藥溪邊踏錦沙布素屢煩卿相揖劍芒猶拂斗牛斜
曲江又廢明年會栽樹何由見倚霞

劉玉汝

字成玉
廬陵人
江西進士

次友人感興

常期冠冕治朝臣豈意天戈老此身耿耿泉阿埋地底
盈盈牛女隔天津誰憐潦倒長爲客自惜娉婷不嫁人
寓跡城闉聊自適琴床書几淨無塵

九江逢故人

九江江水抱城廻，洶湧波濤亦壯哉。
雨散淮瀆隨地足，雲移廬阜向天開。
叟裾鄒子長為客，待詔公孫已擢魁。
邂逅他鄉急呼酒，樓頭今日早秋來。

劉倩玉字伯琛歐鄉人江西進士

中秋對月

十年對月干戈裏，忍向尊前更浩歌。
光滿又逢新節序，影微難驗舊山河。
霓裳猶記開元曲，桂籍空懷進士科。

矯首廣寒宮
闕近欲將消息問姮娥

施子博

咸陽懷古

咸陽秋色草離離
千古愁雲鎖翠微
黃犬已亡秦鹿失
白蛇初斷漢龍飛
烟消故國空流水
樹老荒城自落暉
應是驪山九泉下
死魂猶望采芝歸

濟雅穆爾坦

字元德回回人
浙東僉都元帥

寄穆爾古蘇院判

將軍辛苦事戎行麾下論兵總俊良沙漠蘇卿多感慨
鑑湖賀老自清狂風塵滿眼青山舊天地無私白髮長
萬里君親俱在念扁舟何日賦滄浪

遊定水寺寄杜堯臣

水紋藤簟竹方床山閣重陰雨後涼新月梧桐秋未老
孤燈機杼夜初長白魚入饌松醪熟紅稻供炊筍脯香
雲樹芝泉隨處好一時清賞肯相忘

阿爾沙字允中回人翰林應奉

題九靈山房圖

夢裏鄉山十載違丹青咫尺是耶非墨池
新水春還滿書閣晴雲晚更飛張翰見機先
引去管寧避亂久無歸人生若解幽棲意處處丘園有蕨薇

題前餘姚州判官葉敬常海堤遺卷

潮汐東來勢蹙天一堤橫捍萬家全陵邊谷變人誰在
海晏河清事獨賢曉日山川神禹跡秋風禾黍有虞田
河渠他日書成績應並宣房與代傳

鴻年

西域人

送定海許縣丞

蛟門佐邑滿南去候庭闈雨露隨花綬雲霞避綠衣賢聲今已著色養舊無違萬里滄溟月清秋作伴歸

贈李仙姑

何年萼綠華來降地仙家花擁青鸞節香隨白鹿車清輝迴雪月玄想結雲霞不赴瑤池宴桃開幾度花

托太師

淮海重聞斧鉞臨一時黎庶盡傾心雷霆聲播天威遠
霖雨恩添帝澤深暗室有蠅污白璧明廷無象鑄黃金
風塵未息英雄死坐對江山慨古今

靳公子

中朝公子多才俊瀟洒風塵獨靳侯白鴈久無天上信
黑貂漸弊雪中裘虛堂簾影遲遲晝別館燈光淡淡秋
到手深杯須劇飲醉鄉消得古今愁

寄胡敬文縣尹胡遂初真人

時二公皆在京師

全楚英材集士林十年兵革盡消沈崑岡火後餘雙璧
錦里書回抵萬金鳬鳥趁朝天闕近覽裳展曲月宮深
誰知海上垂綸者去國長懸萬里心

寄昌國濟汝舟長老

先兄太守嘗題詩方丈

西江禪伯住東溟境接蓬萊地有靈析木秋濤浮座白
扶桑朝影拂簷青已無鶴近雲間錫祇有龍聽月下經
李白騎鯨天上去題詩誰復扣岩扃

逃禪室與蘇伊舉詰舊有感

不學楊雄事草玄且隨蘇晉暫逃禪無錐可卓香巖地
有柱難擎杞國天謾談丹霞燒木佛誰憐清露泣銅仙
茫茫東海皆魚鱉何處堪容魯仲連

贈李上水道士

上水湖廣咸順王門人

玄元孫子玄都客嘯傲三湘七澤間黃鶴白雲迷鄂渚
青牛紫氣滿函關袖中寶劍雌雄合鼎內金丹大小還
不見吹笙王子晉秋來幾度候缑山

贈九靈先生

挾海懷山謁紫宸擬將忠孝報君親忽從華表聞遼鶴
却抱遺經泣魯麟喪亂行藏心似鐵蹉跎勲業鬢如銀
萬言椽筆今無用閑向林泉紀逸民

瑞萱堂為孫原道兄弟賦

手種叢萱孝感深陽和隨見破窮陰侵凌雪色雙花萼
報答春暉寸草心踈翠近分書帶碧嫩黃遙映壽觴金
忘憂坐對高堂晚更聽壎箋奏好音

夢得先妣墓

兵後還武昌陵谷變遷先妣封樹竟迷所在久尋不見露禱大雪中忽感異夢翌日遂得其處賦詩以記云

窮冬風雪正交馳獨扣泉扃訪母慈極浦空江泥滑滑
荒岡舊隴塚纍纍那知恍惚魂歸夜正是呼號淚盡時
孝格皇天吾豈敢聊同烏鳥報恩私

龍從雲

字子高號鈞
魚軒廬陵人

明皇春宮按樂圖

華清宮殿春沈沈。宮門楊柳垂黃金。玉環新度霓裳曲。
曲聲酣動君王心。融融汗體生春困。芙蓉露白桃花嫩。
可憐飛燕在昭陽。李白文章有遺恨。樹頭花煖鶯啼早。
滿院嬪妃總含笑。門外千官進午朝。三郎沈醉不知曉。
漁陽回首飄胡塵。花鋗委地徒霑巾。嗚呼我今展圖似。
閱史有國有家當監此。

明皇秋宮夜宴圖

金莖滴露秋滿衣。玉樓商葉吟參差。六宮沈沈度清樂。

月在華清池上芙蓉枝虹橋錦步上龍尾十八宮娥舞
相對玉環吹笛背銀燈百歡媚得君王醉君王醉卧倚
龍屏羯鼓噭嘈尚未停祿山含笑林甫喜但願君王醉
不醒

失名氏

凌波曲

吳蠶八蘭雙鴛綺繡縷團花金鳳尾昔時啼豔曉粧慵
滿眼春嬌扶不起昔時絳帶羅襪鬆玉尖微露生春紅

翩翩白練輕舒卷
箏擣初翻宮樣軟
三尺春雲入手輕
一鈎新月凌波淺
象床舞罷嬌無力
鴈沙踏破參差跡
金蓮窄小不堪行
獨倚東風玉階立

雪花曲

苦篁獵獵吹北風
黃河水流凝不通
天孫手持白鸞尾
笑埽琪花飛碧空
崑山玉碎瓊樓裂
老龍起舞驚明月
夢覺遊魂不覺寒
醉吟紙帳春雲熱
東家嬌娘厭桃李
學繡宮花瑣窓裏
冷袖擎來欲細觀
隔簾火氣催成水

鶴骨笛

九臯聲斷楚天秋玉頂丹砂一夕休枯朽挽回生死調
淒清吹盡古今愁魂歸遼海身如寄曲破江城月滿樓
惆悵主人三弄罷杳無消息到揚州

天燈

高掛長繩百尺餘直撐紅燄上天衢一色春髓蒸元氣
九轉靈丹煉太虛綠鳳抱成吞日卯赤龍銜出照天珠
高高不受飛蛾撲長使凡人仰面吁

車中女

青青帷幄映形車
淺露新粧不自遮
繡帶垂膺明綵鳳
茜羅帕首護雲鴉
青夷關外東風柳
丞相園中上日花
亦有擣鞭年少者
雕鞍並坐是誰家

美人紗帶

滿眼春嬌倚綉床
玉釣新綰藕絲長
鴛鴦機上舒晴雪
翡翠簾前蹴曉霜
拾翠不知羅襪潤
踏花猶隔綉鞋香
幾回暗憶吹簫侶
背立東風詠鳳凰

仙壇

碧壇毒蘚影蔭龍蛇騎鶴歸來棗似爪仙語風前飄玉屑
道衣天上海剪雲霞寒潭六月猶無暑老木千年尚有花
采藥青童來借問蒼烟起處是誰家

補遺

陳益稷

萬歲山侍宴

碧漢鳴鸞隔世塵玉京開宴會星辰舞廻鶩背千山雪

酒上龍顏萬國春物被仁風榮御苑水流聖澤溢天津
越南羈旅陪賓列咫尺光瞻日月新

程文海

葛推官平反

大梁秋官仁且明刑者復續死者生昔無一兒慰目前
璣枝玉樹今森然力田種苗苗或荒君家種德子滿堂
子孫闕不可忘

劉單州棄官赴兄台州之喪

一手有急一手赴左不良行右須駐人心取舍有重輕
所以劉侯如脫兔好官尚有兄則無死今不死孤不孤
允思故人今始見我欲書之寄董狐

緝熙殿御題紫薇花扇面壽卿中丞十一月二

十五日

江南十里花茫茫紫薇盡對中書堂天工會得無窮意
一枝宛轉留芬芳緝熙殿裏日月長對畫落筆蛟龍翔
花前未覺風流遠扇底猶含雨露香烏府先生黃閣老

高敞新齋坐霜昊聊題此畫托千年從今永伴中書考

阿房宮

智力有窮天不老秦帝山河迹如掃參差忽落畫圖間
白髮朝臣驚欲倒咸陽初起阿房宮六籍已焚兵已鎔
渭水函闕萬年固終南泰華五雲中複閣重樓鬱相望
翠戶金鋪九天上上容萬人常有餘下建大旗知幾丈
霞騫霧翼天日迷山童野赭民睽睽窮奢極麗猶未愜
謂海可梁天可梯蓬萊何處樓船遠上蔡東門歎黃犬

六國樓臺春草長千門歌舞斜陽轉游觀未畢化埃塵
宮樹淒涼野鹿馴至今世上丹青手留與千年作諫臣

滕賓

贈弓秋蟾

瓊花十里小樓紅醉吞牛斗眠長虹十年四海分萍蓬
一笑邂逅滕王洪床頭回首黃金空但覺耿耿盤心胸
問蟾何不歸蟾宮自有老月留身中誰受一粒金丹紅
學得紙上畫墨龍白晝呼吸風雲從頃刻霧暗天濛濛

妙處巧奪造化工不復知有陳所翁君不見金陵壁上
不點瞳點瞳霹靂驚江東我欲煩君具臺楮畫一小龍
回顧母普令天下生孝心不向江湖常驗雨

虞集

三鳳行贈海東之下第南歸

海東之兄弟三人如鳳凰胸臆羽翮皆文章九年三入
天門翔伯冲天季驚人一日四海皆知名東之之文五
色雲見者眩晃生眩昏三進三已之子若耳不聞二人

得之喜未足云東之不慍乃可尊東書江上歸見親君子之樂樂最真君不見匡廬之山峭崿而嗟峨左界乎豫章諸川會為蠡都其陰千源洗河導岷經潛浸山氣束鬱不得去上衝為紫蓋直與天相摩為雲覆八極為雨漲九河海東之子能觀山以成德其進益未易量也偶爾小訛奈爾何

龍卵

入眼圓如頸下珠也知靈物化生殊淋漓猶帶元氣濕

混沌終含太極初雨施雲行待時至海涵春育有神扶
明當一躍天池去滂沛恩波及涸魚

琉璃觀音

化身千百億無窮却入琉璃世界中金色光中觀自在
玉臺影裏現圓通一塵不染慈悲像萬劫難逃幻化工
要識本來真面目除非打破大虛空

滕王閣二首

城頭高閣挿蒼茫百尺闌干背夕陽秋雨魚龍非故物

春風蛻蝶是何王
帆檣隱隱來彭蠡
車蓋童童擁豫章
燈火夜歸湖上路
隔籬呼酒說干將

高閣城頭戶牖開
江間照見碧崔嵬
文章誰繼三王後
雲氣常隨五老來
畫角數聲南斗落
白鹽萬斛北風迴
潭心應有蛟龍窟
怪得詩成急雨催

元音卷十二